



Prijedlog

Na osnovu člana 2. Zakona o osnovama sigurnosti saobraćaja na putevima u Bosni i Hercegovini („Službeni glasnik BiH“ broj: 6/06, 75/06, 44/07, 84/09, 48/10, 48/13, 8/17 i 9/17 i člana 6. stav 1. alineja 2. Statutarne Odluke o organizaciji Grada Gradačac u skladu sa Zakonom o Gradu Gradačac („Službeni glasnik Grada Gradačac“ br: 1/19), Gradsko vijeće Grada Gradačac na 6. redovnoj sjednici održanoj ____ juna 2021. godine, donosi:

ODLUKU o izmjenama i dopunama Odluke o bezbjednosti saobraćaja na putevima Općine Gradačac

Član 1.

U Odluci o bezbjednosti saobraćaja na putevima Općine Gradačac („Službeni glasnik Općine Gradačac“ broj: 7/08, 2/09, 5/10, 5/1 i 5/19.), Član 6. („Zabrana odvijanja saobraćaja“) mijenja se i glasi:

- (1) Zabranjuje se saobraćaj teretnih vozila, autobusa, traktora i zaprežnih vozila u slijedećim ulicama:
 - a) Titovom od Crvene škole i
 - b) H.K. Gradašćevića do kraja ulice kod zgrade javnog komunalnog preduzeća “Komunalac” Gradačac.
- (2) Zabranjuje se saobraćaj za sva motorna vozila u ulici H.K. Gradašćevića (od sata do malog kružnog toka kod MUP-a) u periodu od 01. maja do 31. avgusta u terminu od 20-24h.
- (3) Zabranjuje se saobraćaj za sve vrste motornih vozila, mopeda i električnih balansirajućih skutera na jedan, dva ili tri točka sa jednom ili dvije osovine (troketi, hoverboardi, električni romobili i sl.) u pješačkim zonama i trotoarima: Trg Alije Izetbegovića, Gradski park od Spomenika do Skenderije, izuzev staze s lijeve strane rijeke Gradašnice nizvodno od Spomenika palim borcima 1941-1945. Godina do Sportske dvorane “Skenderija”, Aleja kestena i park Stara banja.
- (4) Zabranjuje se saobraćaj električnih balansirajućih skutera na jedan, dva ili tri točka sa jednom ili dvije osovine (troketi, hoverboardi, električni romobili i sl.) u pješačkim zonama, trotoarima i saobraćajnicama u ulicama Titova, H.K. Gradašćevića i ul. Hasana Kikića.

Član 2.

Član 8. mijenja se i glasi:

“(1) Motorna vozila (hladnjače, cistern zavodu, mlijeko i slično, tečna goriva, vozila za prevoz konfekcije, namještaja, hljeba i dr.) do osam tona ukupne dozvoljene težine mogu se, u cilju snadbijevanja građana, kretati ulicama u kojima je zabranjen saobraćaj teretnih vozila u oba smjera u vremenu od 5.00 do 9.00 sati i od 17.00 do 20.00 sati, pod uslovom da se ne ugrožava bezbjednost saobraćaja.

(2) Odobrenja za kretanja vozila iz stava (1) ovog člana izdaje nadležna Gradska služba za komunalne poslove.”

Član 3.

U Članu 38.alineja jedan mijenja se i glasi:

”- Vozač vozila koji postupi suprotno odredbi člana 6. Ove Odluke, odnosno korisnik vozila koji je punoljetan ili roditelj, staratelj ili lice koje je ustupilo na korištenje predmetno vozilo maloljetnoj osobi.”

U Članu 38. alineja četiri mijenja se i glasi:

“ –Vozač vozila iz člana 8. Ove Odluke koji se kreće ulicom gdje je saobraćaj zabranjen u vrijeme koje nije određeno kao i vozač vozila iz člana 8. Ove Odluke koji se kreće bez odobrenja iz člana 8. stav 2. Odluke.”

Član 4.

Ova Odluka stupa na snagu osmog dana od dana objavljivanja u “Službenom glasniku Grada Gradačac”.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD GRADAČAC
- Gradsko vijeće -

Broj: _____
Gradačac, 2021. godine

PREDSJEDAVAJUĆI
GRADSKOG VIJEĆA

Mehanović Hajrudin, prof.

Obrazloženje:

Pravni osnov:

Pravni osnov za donošenje Odluke o izmjenama i dopunama Odluke o bezbjednosti saobraćaja na putevima Općine Gradačac sadržan je u Članu 2. Stav (1) Zakona o osnovama bezbjednosti saobraćaja na putevima u Bosni Hercegovini ("Sl. glasnik BiH", br. 6/2006, 75/2006 - ispr, 44/2007, 84/2009, 48/2010, 48/2010 - dr. zakon, 18/2013, 8/2017, 89/2017 i 9/2018.) koji glasi: „(1) Organi Bosne i Hercegovine, entitetski i kantonalni organi i organi Brčko Distrikta Bosne i Hercegovine i organi lokalne samouprave i lokalne uprave u gradovima i opštinama (u daljnjem tekstu: nadležni organi) obezbijediće sprovođenje ovog zakona i u okviru svoje nadležnosti donosit će propise i preduzimati će druge potrebne mjere za njegovo dosljedno sprovođenje.“

Također odredbama člana 6. stav (1) alineja 2. Statutarne Odluke o organizaciji Grada Gradačac u skladu sa Zakonom o Gradu Gradačac („Službeni glasnik Grada Gradačac” br: 1/19) propisano je da Gradsko vijeće u okviru svojih nadležnosti donosi odluke i druge opće akte kojima uređuje pitanja iz samoupravnog djelokruga Grada.

Razlozi za donošenje Odluke:

S obzirom da se sa prvim proljetnim danima na području grada Gradačac, a naročito u užem jezgru grada evidentirano pojačano korištenje romobila, skutera, trotineta, hoverboardi, električnih romobila i sličnih vozila na jedan, dva ili tri točka u svrhu zabave na javnim površinama u pješačkim zonama kao i na drugim javnim saobraćajnim površinama, pojavila se potreba regulisanja ove problematike.

U cilju uređenja navedene problematike, te sprečavanja ugrožavanja bezbjednosti pješaka, lične bezbjednosti vozača električnih romobila i ostalih navedenih vozila koji su vrlo često maloljetne osobe te bezbjednosti drugih učesnika u saobraćaju, pripremljen je Prijedlog odluke o izmjenama i dopunama Odluke o bezbjednosti saobraćaja na putevima Općine Gradačac, kojom je propisana zabrana korištenja navedenih vozila na način kako je to navedeno u Članu 1. stav (3) i (4) ove Odluke, a također je u stavu (3) istog člana određeno i mjesto na kojem je dozvoljeno korištenje istih, odnosno dio Gradskog parka tj. Staza s lijeve strane rijeke Gradašnice nizvodno od Spomenika palim borcima 1941-1945. godina do Sportske dvorane “Skenderija”.

Također izmjenama i dopunama ove Odluke izmijenjen je režim saobraćaja dostavnih vozila u zonama u kojima je zabranjen saobraćaj teretnih vozila, u vrijeme od 5.00 do 9.00 sati i od 17.00 do 20.00, što je dosadašnjom Odlukom regulisano u vrijeme od 5.00 do 12.00 sati i od 17.00 do 20.00, ovim izmjenama se nastoji smanjiti frekventnost saobraćaja teretnih vozila u vrijeme od 9.00 do 17.00 sati. Naročito za uže gradske zone gdje imamo ionako pojačano kretanje motornih vozila u navedenom periodu. Također napominjemo, da su i druge lokalne zajednice na sličan način (čak i restriktivnije) regulisale kretanje dostavnih vozila u svojim užim gradskim jezgrima. Također je ovom odlukom što do sada nije bio slučaj uvedeno izdavanje odobrenja za kretanje dostavnih vozila u zonama zabrane, te se i na ovaj način želi ova oblast dodatno urediti.

S obzirom na navedeno predlažemo Gradskom vijeću da Prijedlog ove Odluke razmotri i usvoji.

Obrađivač:
Gradska služba za urbanizam, investicije
I komunalne poslove

Predlagач,
Gradonačelnik,

